

**URUTONDE RW'AHANTU NYABURANGA, AMAHOTELI
N'IBIYAGA**



IBIRO BY'AKARERE KA NGOMA

ABANTU N'UDUSOZI BYABAYE INSIGAMIGANI

A) Abantu bitiriwe ahantu

1. Ku Cyasemakamba

Ahitwa ku Cyasemakamba haherereye mu Murenge wa Kibungo, Akagari ka Cyasemakamba nyine, Umudugudu wa Kiruhura. Aha hakaba ari naho hubatswe ibiro by'Akarere ka Ngoma. Aya makuru ku bijyanye n'amateka ya Cyasemakamba tuyakesha Dewo Nikomwise(1953), akaba n'umwuzukuru wa Semakamba nyir'ubwite (se umubyara ni Nepomuseni Gakwavu, umuhungu wa Semakamba). Nepomuseni Gakwavu, umuhungu wa Semakamba).

Nikomwise yatubwiye ko sekuru Semakamba yavukaga aha hoze ari i Gitarama, mu Marangara. Yari mwene Shumbusho wa Vuningoma wa Rwaswa, akitwa Umwasa kubera uwo Rwaswa nyine. N'abamukomoka ho bitwaga Abasa b'abashambo. Semakamba kandi yari ingabo y'umwami Rwabugiri watsinze burundu i Gisaka, akacyigarurira, akakigira ubutaka bw'u Rwanda (D'Arianoff, 1952). Ubwo Semakamba yahise atura aho hantu hamwitiriwe, maze Rwabugiri we yubaka urugo rwe i Sakara.

Aho Semakamba yari atuye yahateye ikivumu, kirakura, kiba inganzamarumbo. Cyaje kurimburwa muri za 1980, maze hubakwa ikigega cy'amazi. Ikigo cya Leta cyakirimbuye icyo gihe cyitwaga ELECTROGAZ; ubu cyitwa WASAC. Ubu hubatse nyine icyo kigega cy'amazi agaburira umugi wa Kibungo nk'uko bigaragara ku ifoto ikurikira.



Ikigega cy'amazi cyubatswe aharimbuwe ikivumu cya Semakamba

2. KARUTANESHTWA

Aho hazwi nko ku Karutaneshwa haherereye mu Murenge wa Kibungo, Akagari ka Mahango, umudugudu wa Karambi. Aka gasozi (ka Rutaneshwa) karahanamye cyane ku buryo Polisi ihakoreshereza ibizamini byo gutwara imodoka na moto (mu byitwa Demarrage). Umuhanda wa kaburimbo utari wubakwa, niho hanyuraga umuhanda mukuru Kigali-Rusumo uhuza u Rwanda na Tanzaniya wanzwe n'Abadage.

Nk'uko tubikesha Ananiyasi Mushumba (1954), Karutaneshwa ni gasozikari gatuyeho umugabo witwaga Rutaneshwa mwene Ruzirampuhwe, akaba yarabaye sushefu wa Gacinya Fawusitini ka Nyirinkwaya. Yabanje kuba sushefuaho bita Nyange na Mirenge mu Murenge wa Zaza. Muw' 1952, nibwo yagabanye ako gasozi kaje kumwitirirwa. Aka gasozi karahanamye cyane, kakaba ari ko Rutaneshwa yari atuyeho; nuko baza kukamwitirira. Rutaneshwa yabaye sushefukugeza mu mwaka wa 1961 ari nabwo we na shebuja bahungiraga muri Tanzaniya kubera imvururu,

urugomo n'ubwicanyi byari mu gihugu guhera mu w'1959. Bageze mu mahanga, Rutaneshwa apfira yo; Gacinya we yahungutse nyuma ya jenocide, atabaruka yaragarutse mu Rwanda. Cyokora, ubu ngo hari umwuzukuru wa Rutaneshwa witwa Mukasa utuye i Kigali. Isambu yahoze ari iya Rutaneshwa ubu yakaswemo umudugudu, ikaba ituwe n'abantu atandukanye. Ubu Akarere ka Ngoma karateganya kuhubaka umudugudu w'icyitegererezo ujyanye n'igishushanyo mbonera cy'umuji wa Kibungo.



Ikirundo cy'ibice by'amatafari, amabuye n'amategura byari byubatse iyo nzu ya Rutaneshwa

b) Amazi, ibimera, n'ibindi bintu bigaragara ku butaka

1. Amajanja y'imbwa za Ruganzu



Ibyitwa amajanja y'imbwa za Ruganzu biherereye mu murenge wa Jarama, Akagari ka Kibimba, Umudugudu wa Murama. Iyo witegereje neza kuri urwo rutare rushashe neza, usanga koko hariho utwobo tumeze nka twa tundi tw'igisoro(bakina cyangwa se ikibuguzo), dufukuye mu rutare koko. Dushushanyije neza neza nk'aho imbwa yaba yarakandagiye. Ikindi kandi kihagaragara, ubona hameze nk'aho umuntu yicaye, maze utwo twobo tugasa nk'utw'igisoro. Mu gushakisha amakuru ajyanye n'ibivugwa ko ari amajanja y'imbwa za Ruganzu, twaganiriye

2. Urufunzo rukikije umugezi w' Akagera.

Bivugwa ko umwami Ruganzu n'ingabo ze bakundaga gukoreramo umuhigo kuko habagamo inyamaswa nyinshi. Kandi ngo bakundaga kuhambukira bateye hakurya i Burundi. Ibyo byatsi bimeze nk'ishinge ryumye byameze hejuru y'urutare runini rushashe neza, bikavugwa ko umwami Ruganzu n'ingabo ze bakundaga kuharuhukira ubwo babaga bavuye ku rugambacyangwa mu muhigo.

3. Amazi y'amakera y'inka za Ruganzu



Nk'uko tubikesha abakambwe Edisoni Kabengerana na Ruhorahoza, aya mazi aherereye mu Murenge wa Sake, Akagari ka Rukoma, Umudugudu wa Mukoni.

Bahita ku iriba rya gakondo, niho inka zo mu gihe cya cyami zanyweraga, dore ko inka zose ubundi zitwaga iz'umwami. Inyambo z'umwami zabaga kumutware witwaga Sematuro waje guhungira muri Uganda muri za 58, yaje guhunguka mu w'1997, yitaba Imana mu w'2014. Aya mazi abamo umunyu mwinshi ukundwa n'inka kuburyo iyo iyagezeho, iranywa cyane ntiyigarure, ku buryo utayikuyeho yasandara.

4. Ibigabiro by'umwami Rwabugiri



Amakuru y'Ibigabiro by'umwami Rwabugiri i Sakara tuyakesha Yozefu Byamana na Dewogaratsiyasi Nsengiyumva bo mu Murenge wa Murama, Akagari ka Sakara, Umudugudu wa Gatonde, ndetse na Agusitini Mudaheranwa nawe utuye muri uwo murenge, Akagari ka Kigabiro, Umudugudu wa Kigabiro. Ubundi Ibigabiro niubwoko bw'ibiti byaterwaga ku rugo, twavugaga nk'umuvumu (igitoma), umurinzi (umuko), umuhororo ariwo murehe, ndetse n'umubanga. Ibi bigabiro byitwa ibya Rwabugiri biboneka mu Murenge wa Murama, Akagari ka Sakara, mu Mudugudu wa Rubare. Bugufi y'ibyo bigabiro kandi hari n'ikigo cy'amshuri cya Groupe Scolaire Mvumba nk'uko bigaragara kuri iyi foto ikurikira.

Aya ni amashuri ya Groupe Scolaire Mvumba yubatse i ruhande rw'ikigabiro cy'umwami Rwabugiri.

Iki kivumu cyari mu rugo rw'umwami Rwabugiri. Na n'ubu kiracyahari. Aha hahoze urugo rw'umwami Rwabugiri, rukaba rwarubatswe ahagana mu w'1885 nyuma y'aho atsindiye i Gisaka, agafata na Rukurura, ingoma ngabe yacyo. Ahatura, hitwaga Sakara y'Abarinda (Abarindarugamba). Ibyo bigabiro byaba byaratewe n'abubakaga urugo rw'umwami, abo bari abatware babaga bafatanyije n'abagaragu b'umwami.

Umwami yahisemo gutura i Sakara kuko hari ahantu hirengeye. Ni umusozi muremure usumba iyindi yose muri aka gace kuko iyo uhahagaze uba ureba muri Tanzaniya. Ndetse iyo imvura ihise, uba ureba neza ibirunga biherereye mu Ntara y'Amajyaruguru. Ibi bisobanuye kouyu musozi ari muremure rwose. Magingo aya, ahahoze urugo rw'umwami hari umudugudu utuwemo n'abaturage batandukanye.

5. Ibisoro bya Ruganzu



Ibi mubona byitwa ibisoro bya Ruganzu, biri mu rutare, biherereye mu murenge wa Sake, Akagari ka Rukoma, mu mudugudu wa Nyagasozi. Amakuru yerekeranye n'ibi bisoro twayahawe na Edisoni Kabengera uhaturiye. Yatubwiye ko Ruganzu yaba yaraciye ibi bisoro kugira ngo abashe kubuguzza n'ingabo ze, igihe babaga bariho baruhuka, bavuye kurugamba. Bivugwa ko bari bahanganye n'umwami wayoboraga za Muyinga na Giteranyi mu Burundi. Undi mugabo w'igihumuza twaganiriye ni Ruhorahoza (1942) wo mu Murenge wa Sake, Akagari ka Rukoma, Umudugudu wa Mukoni. Yatubwiye ko ibi bisoro bishobora kuba ari ibya Ruganzu, akaba yarabicukuzaga ubugenge n'imitsindo ye.

6. Ikirenge cya Ruganzu



Iki cyitwa ikirenge cya Ruganzu n'aho yateretse agacuma yanyweragamo inzoga y'umutsama biherereye mu Murenge wa Jarama, Akagari ka Kigoma, umudugudu wa Ramiro.

Abaduhaye amakuru kuri ibi bimenyetso ni Faransisiko Ndoriyobijya (1948) na Visenti atarayiha, bombi bakaba bavugaga ko ibyo bazi babikesha uruhererekane rw'amakuru babwiwe n'ababyeyi, nabo bakaba bayakomora ku bababanjirije. Bombi batubwiye ko Ruganzu yaba yarahakandagiye kuko ngo yakundaga kurambagira igihugu; akaba yaranyuraga cyane ku nkengero z'urufunzo, agezura imbibi z'igihugu cye, anareba i Burundi, hari hakurya yaho.

Bongeyeho ko yakundaga no kuhanyura ahiga n'imbwa ze, ari kumwe n'abahigi.

7. Inzu y'umwamikazi Nyirakabuga



Umwamikazi Tereza Nyirakabugayavukiye i Rusororo muri Gasogi (Akarere ka Gasabo), yashakanye na Yuhi V Musinga. Nyirakabuga Tereza yabyaranye na Musinga abana batatu aribo Rwigemera, Mukamurera, na Bakalishonge. Ntibyatizwe, Nyirakabuga Tereza yaje gutandukana na Musinga, nuko arongorwa n'umuzungu witwaga Kabutura, akaba yari adiminisitarateri wa Teritwari ya Kibungu.

Amakuru ajyanye n'iyi nzu twayahawe na Amburuwazi Mundanikure (1936), uvuga ko nawe yakuze agasanga iyi nzu yubatswe mu isambu ya se. Mundanikure yatubwiye ko mu byifashishijwe mu kubaka iyo nzu harimo amatafari, icyondo, umucanga, sima, amabuye, n'amategura. Iyi nzu ishobora kuba yarubatswe ahagana mu w'1930 mu Murenge wa Rurenge, Akagari ka Kagarama, Umudugu wa Kibimba. Iyo nzu ifite uburebure bwa metero cumi n'eshanu.

8. Urukiko rwa Gacinya

Urukiko rwa Gacinya ruherereye mu murenge wa Kazo. Ahahoze ari i Gihunya, hari urukiko rumwe ari rwo urwo rw'i Kazo bitaga urwa Gacinya. Mirenge nayo ikagira urwayo rwari i Rubago, noneho na Migongo ikagira urwayo rwari rwubatse i Nyarubuye. Birakekwako uru rukiko rushobora kuba rwarubatswe ahagana mu 1935. Rukaba rero rwari urukiko rwa sheferi ya Gihunya yayoborwaga n'uwo Gacinya Fawusitini. Ubigereranyije n'ubu, usanga runganya bubasha n'Urukiko rw'Ibanze rwa Ngoma. Gusa byaje kugera aho urwo rukiko rwaje gusimburwa n'urwa Kanto ya Birenga, ariko nayo yaje gusimburwa n'urw'ibanze rwa Ngoma



B. IBIYAGA N’INZUZI

1. IBIYAGA

Mu Karere ka Ngoma dufite ibiyaga 3 aribyo :

a. Ikiyaga cya Mugesera

Gikororwamo uburobyi bw’amafi ndetse hagakororwamo uburyo bubezweho bwo gutwarwamo ibintu bitandukanye n’abantu



Mu rwego rwo kworoshya ingendo zo mu mazi, hagamijwe ubuhahirane hagati y’Imirenge ya Mugesera – Sake – Rukumberi – Karengye (Rwamagana), Akarere kasanye icyombo cyari cyarapfiriye mu Kiyaga cya Mugesera, ubu kikaba kiri gukora

b. Ikiyaga cya Sake

Gikorwamo ubworozi bw'amafi muri Kareremba.



Mu Murenge wa Jarama, hari koperative yatangiye ubworozi bw'amafi muri Kareremba mu Kiyaga cya Sake.

c. Ikiyaga cya Birira

Ni ikiyaga gihereye mu Murenge wa Rukumberi nacyo gikorwamo ubworozi bw'amafi

2. INZUZI

Uruzi rw'Akagera runyura mu Karere ka Ngoma, rubamo amafi y'ubwoko butandukanye, kikaba gikikijwe n'igishanga kinini, gikorwamo ubuhinzi n'ikindi kirimo urufunzo.

C. AMAHOTERI

Mu Karere ka Ngoma hari Hoteri imwe yitwa Saint Joseph ifite ubushobozi bwo kwakira abantu 70, n'amacumbi aciriritse 8, yose hamwe afite ubushobozi bwo kwakira abantu 96.



Hoteri ya Saint Joseph ifite ubushobozi bwo gucumbikira abantu 70.

Mu rwego rwo gukemura ikibazo cy'amacumbi n'aho kwiyakirira, Akarere ka Ngoma kagiye kuzuza Hoteli y'inyenyeri eshatu.



Ifoto igaragaza hoteri y'Akarere ka Ngoma, irimo kubakwa, ubu igeze ku Musozo.